

蘆川歸來集卷第十三

贊

薌林居士贊



雍熙相國之胄憲肅母后之家視富貴如
浮雲棄軒冕猶弊屣良由天資拔俗雅志
好賢臨事必欲出奇為善常恐不及所謂
胷中立壑皮裏陽秋益自英妙時固已沈
著痛快矣雖曰守節仗義而遠蹈危機雖
曰正色立朝而獨往勇決殆將明哲以保

身優游以卒歲者欤若夫袖手旁觀傲睨
一世福祿未艾俟命方來則予謹在下風
也識者見之亦必有取於斯語

俞義仲畫贊

神鋒清兮有矍儒列隱之風骨勝度閑兮
無公子王孫之習氣外和同乎衆人而中
傲睨於一世袖手旁觀不妨遊戲與予定
交垂四十年更歷險夷未嘗以升沉炎涼
毀譽軒輊使其聳壑昂霄一日特起雍容
進退所謂若素官于朝者非斯人而誰耶

彭德器畫贊

凜然其容也雖甚莊視江左風流兮所長
琅然其辭也雖甚辯異戰國縱橫兮可賤
益氣節勁而論議公心術正而識度遠使
之臨敵對壘則必以中輞遺人若夫委質
策勲自當以劍履上殿野服兮蕭散用未
用兮又何怨知我者無取八州督不知家
者聊復三語掾

范叔子畫贊

色莊而語簡性舒而度勝固嘗叩之以前
輩出處典刑參之以方冊治亂譏評初若
無意是非莫定從容久之彷徨四顧而乃
袞々如川流霏々如鋸屑大抵術公而論
議正信乎鑿坡之世家傳諸唐鑑之學問
儻未見於行事施於有政將何以發冒次
渟衍之深且孰能繼門戶人物之盛吾知
佩玉珥貂遭時遇合猶當勉焉自不失其
為名卿聊復冠屨櫛貝遠而望之僉曰儒
服斯之謂稱

妙喜道人真贊

無礙辯才正法眼藏喜怒妄真初不著想
坐斷生死路頭勃跳毗盧頂上吞却粟棘
蓬管甚黃茅瘴有人認得老師放他三十
拄杖

慧照譽和尚真贊

行解一如根器純熟果位中古聖賢叢林

中老尊宿三樂十二分橫說倒說圓通八
萬四千門胡現漢現具足大洪山頂運慈
悲攝受虎狼虵虺毒正當恁麼時好作沒
量福維摩鉢裏遍虛空活盡行旅衣冠族
誰能辦此供養心要使衆生脫魚肉我知
芙蓉宗派有兒孫那箇是渠本來真面目
咄

康伯檜畫贊

元紫芝眉宇澹然簡古謝幼輿丘壑正爾
卓犖迺若吾子以邁往不羣之氣與神鋒
太雋之姿方幼輿恐未免于富貴慕紫芝
雅有志于文辭蓋浮遊物表殆彷彿其如
此彼輪囷冑次亦孰得而知耶

西禪隆老海印大師贊

楊子江心飽經波浪臨平山上看盡風光
驀然唱箇還鄉曲來坐海山古道場其圓
機轉物也山河大地不離掌握其辯口談
天也邪魔外道為之膽碎知我者謂我逢

場作戲不知我者謂我拖泥帶水請看父
母未生時只這面目何曾是吐

醫僧真應師贊

慈濟之孫慧覺之子以疾苦度諸衆生以
藥石作大佛事是為僧中之扁鵲故能療
人之垂死而圓頂方袍亦畧取其形似者
也

高蓋長老真贊

喚作似慈濟也唱喚作不似慈濟也唱夢
幻泡影本來空耳鼻舌身皆假合慈濟由
是強名梵志常翻著鞵赤灑活發吐

蘇廷藻畫贊

賢公孫而樂為寒士生涯佳少年而慕用
前輩風味蓋名駒在閑已有千里之足於
菟墮地便有食牛之氣天乎早孤自立于
世噫抗志患不高其高常失于絕物閱書
患不廣其廣或滯于未通必也襄陽秋于
皮裏吞雲夢于胃中是宜尚友古之人道

何慮不挺：然祖風充乎大者自可以華
其國用其小者亦足以美厥躬

自贊

爾形侏儒而行容與所守者獨出處之大
節所歷者皆風波之畏塗彼其或取者在
是為之不悅者有諸使其佩玉劔履定非
廊廟之具野服杖屨庶幾山澤之懼乎

丙寅自贊

這癡漢沒思算初乏田園却懶仕宦辦得
所向方圓未嘗敢做崖岸只用兩僕肩輿
不羨儻來軒冕投閑二十餘年善類干煩
殆徧好之者徹底信其真貧惡之者豈免
遭他點檢要當畢娶杜門自斷此生憂患
罷去謁府參官一等着衣喫飯休拈翰墨
文章說甚安危治亂就使立事赴功決定
違條礙貫箇中人高着眼方瞳綠髮照青
春期與飛仙游汗漫現此風狂道士身長
康晞月聊相伴

庚申歲自贊

一旦謂吾仕耶毀冠裂冕與世闊疎一旦
謂吾隱耶垂手入鄴與人為徒愧姓名之
未能變何形容之猶可圖頗欲治貨殖兮
方陶朱公不足聊復啖杞菊兮視天隨生
有餘行年五十矣雖髭髮粗黑然田廬皆
無陶：兀：遇飲輒醉著枕即寐一念不
生萬事不理至于酒醒夢覺則又大笑而
起摩腹叩齒孰不睥睨曰此老真甚愚

甲戌自贊

蘆川老居士今春六十四勇退急流中畢
竟只這是胡為元命年輒下廷尉業風
何見吹逆境忽現示儻非造物慈孰貸小
人戾故山念欲歸夙債尚留滯骨肉頗相
忘眠食初未廢心存自在天腳踏安樂地
歡喜待衆生寬親平一切騰騰兀兀行默
默玄玄意脩然岸幅中聊寫形神氣認取
主人翁莫問似不似咄

陳居士團圞圖贊

我觀世間種々業此老化行無盡緣示現
百年居士身來償七十未了債是心久作
露電現寃親恚具解脫門何止九族出輪
迴普願衆生成正覺

圓淨律師贊

師傳行業攝羣魔及見東坡所得多老向
西湖清徹底更開雪窟現森羅

圓首座贊

橫挑榔栗布囊寬江北江南踏遍山參得
黃龍死心句歸來誰問透三關

東坡為焦山綸老作木石却書
招隱一段因緣在紙尾團菴寶
之欲贈好事大檀越作歸止計
為題數語

招隱公案焦山戲墨雖然信手拈來自是
冒襟流出價直百千兩金成就團菴三窟
咄

布袋和尚贊

維此大士無邊身三千大千同微塵慈悲
憫爾末劫人顛倒雜懷貪癡嗔布囊示現
睡豈真作如夢觀非想因劫火不壞囊常
存衆生恚度解脫門我来稽首彌勒尊普
為說法一切聞

銘

山桂菴銘

晉安劉公華即延平官舍西麓誅茅結廬

画山旁桂地不踰丈而盡挹勝覽真隱居
士過焉命曰山桂菴取小山叢桂之句也
因為作銘銘曰
眼界貴寬心地貴閑耳根貴靜劉子結廬
畏此簡書雖吏去隱山光蒼々谿水決々
是用適性旁據桂叢秋芬揚風俯視奔競
誰為賞音與時浮湛期則有命凡厥後來
優哉游哉順受其正

休菴銘

同郡李君應求榜其燕居曰休菴嘗屬桐
鄉朱公新仲為之記出以示予且乞銘座
右書云作德心逸日休噫仰不愧于天俯
不忤於人厥有旨哉予以是知應求所存
心矣作休菴銘銘曰

古君子儒環堵之室心廣體胖既安既佚
養此休譽時乃休功為名公卿休祥在躬

晉安黃夫人墓誌銘

有宋處士鄭君德稱之室黃氏台州黃巖

縣尉諱待問之長女黃鄉先生也家世晉
安夫人自幼聰慧過人事親誠孝先生夫
婦素鍾愛之擇所宜配年二十歸處士治
家斬：有條理歲時祀事必躬蠲潔馭戒
獲革寬猛適當得其權心未嘗施鞭朴唯
以善言訓誨之率就規矩不怒而威咸耻
有過失十五年中安貧自樂順適處士之
意頗如德耀事伯鸞內外姻黨無問疎戚
聞夫人之風靡不欽慕歲在癸巳夏四月

處士歿於大父舊廬夫人是時年未四十
持喪甚嚴諸孤纍纍然方齠齔夫人非特
能守其志且慮郊居從師匪便亟斥賣奩
具得舍數椽直郡庠之左俾兒曹朝夕尊
所聞見蓋不待三遷果皆業儒夫善師孟
母若夫人者鮮矣紹興辛未春正月以壽
終享年七十八後七年戊寅歲某月某日
岳舉其柩合塋于處士墓是為懷安縣欽
德里文山之原男三人長曰岳次曰岳蚤

卒季曰岡嘗預鄉薦不祿女六未嫁而夭
今獨岳存孫男二人曰庠曰育皆為士孫
女三人長適進士陳炳文餘在室岳雅尚
不群無心進取以翰墨游公卿間養母盡
孝人喜餽之用助甘旨與予別八九年矣
三遣書告以塋期必欲求予銘其母每請
愈堅義不可辭乃為之銘銘曰

銘闕

蘆川歸來集卷第十三

蘆川歸來集卷第十四

青詞

皇太后青詞

東朝違豫晨昏省定以尤勤南面焦勞上
下神祇而致禱霈澤普施于寰宇歡聲允
洽于黎元皇太后殿下誕育聖躬欽崇
天道厚載之德惟廣無疆之壽愈隆節宣
微爽于冲和康復竚迎於景貺臣班陪從
列職在奉祠敢稽香火之修是用壇場之

被降靈車風馬而來格粲珠星璧月以昭
回四海馳心仰慈寧之有喜千春受祉卜
長樂之方興

戊午歲醮詞

戴天履地雖為萬物之靈負陰抱陽莫出
五行之數時推禿泰命係窮通敢忘知止
之心輒叩益高之聽竊念臣孤根自立薄
祐良竒少有意于功名壯適丁于離亂忝
國門者逾一紀脫班簿者將十年非不貪

厚祿以利妻孥私憂四海之橫潰非不好
美官以起門戶痛憤兩宮之播遷忍耻偷
生甘貧削迹掛衣冠而不顧辱溝壑以何
疑故鄉同流寓之徒老境覺侵尋之晚中
原別業蕩兵火以無涯先世弊廬緣喪葬
而易券甚欲畢嫁娶之累稍容追耕釣之
游志願未諧經營殊拙值此劬勞之日占
于熒惑之躔允屬忌星宜遭讒口載懼愆
尤之積重罹災禍之深用罄祈禳投哀造

化伏望回光碧落垂鑒丹衷俾爾安閑常
遇豐登之世錫其壽富曲成隱逸之民

本命日醮詞

臣聞災祥雖由于天降善惡必自於己求
天亦何私已當無愧儻或陰陽之繆盪尚
容襍禱于過愆敢瀝丹衷仰干鴻造竊念
臣蚤師前輩許奮孤忠頌功名之會難逢
在出處之間加審嫉邪憤世徒有剛腸憂
國愛君寧無雅志忝脩門僅周二紀歸故

里殊之一廛未免口腹以累人所望兒女
之畢娶晚節優游於井臼甘心潦倒於山
林悉繫生成良增跼蹐迨此建寅之月適
臨元命之辰恭啓星壇特延羽服償其夙
願冀以小亨庶寬填壑之憂徐治先塋之
役伏願上蒼昭鑒衆聖扶持適觀正論之
行坐待中原之復獲同遺老用保餘齡

代人為母生朝青詞

長生久視必欽奉於真詮道骨仙風迺本

原於夙契竊推步閏餘之數常跼蹐覆載
之私爰卜災祥儻容襜褕伏念妾派分王
族聘自相家蚤歷艱難旋罹倣擾仰照臨
三光之下火宅煎熬役思慮五濁之中塵
緣束縛每存心於公正或造業於貪嗔積
習愚癡稔成罪戾頑罔逃於陰譴實有慊
于隱憂蝨、螻蟻之微駸、桑榆之晚戍
辰將換甲子既周雖齒髮不至甚衰而福
祿敢期未艾適屆始生之旦甫迎元命之
年是用蠲潔壇場闡揚科教延羽流而齊
戒喫龍液以袪除伏願紫府增齡蒼穹降
祉雲仍稱壽北門戶之簪纓祖禰居歆勤
歲時之蘋藻俾豐衣而足食盍問舍以求
田俯徇丹衷悉繫鴻造

生朝青詞

臣聞覆載無私萬物咸資于長養榮枯有
數四時密運於盈虛輒希作善之祥敢黷
曲成之造伏念臣孤忠自許蚤雖抗志於

功名拙直乏謀久已求全于出處浮湛里
祉經涉星霜固貪爵祿以素餐寧向山林
而獨往未忘跼蹐庶寡悔尤浸尋遲暮之
年永感劬勞之日爰伸夙願式舉真科伏
願飈馭下臨丹臺降格憫茲遺老錫以脩
齡俾坐見於升平獲行歌而逸樂

正旦本命青詞

臣聞五行錯綜考定數以係窮通六甲循
環推飛宮而占休咎伏念臣甘心貧病匿
跡埃塵敢誣道以信身粗知榮而守辱庶
逃陰譴猶有私憂太歲丙寅衝對長生之
運元日辛未首臨本命之辰適契合神或
為吉會是用導迎殊祉虔啓真科延飈馭
以集祥歎琳壇而精禱伏願圓穹垂覆列
曜騰輝儻善貸以遐年必曲全其晚節俾
遂隱居之志聊存積慶之家

代人本命設醮青詞

臣聞覆載無私萬物咸資于造化盈虛有

數四時密運于機緘，輒希作善之祥，仰黷
益高之聽。伏念臣孤忠自許，蚤雖抗志于
功名，拙直乏謀，久已求全于出處。荷聖神
非常之知遇，會風雲疇昔之夤緣。接武從
班，丐祠真館，爰再三而力請，覬萬一以便
私侵，尋遲暮之年，坐享素餐之祿。未忘跼
踏庶寡，過尤不無。役思慮于五濁之中，豈
能逃照臨于三光之下。果曲成于雅欲，然
有慊于養病，適丁戊辰元命之朝，迺屬已

卯立秋之閏，儻容禱禱，敢怠精虔。是用蠲
潔壇場，闡揚科教，延羽流而齋祓，嚙龍液
以滌除。伏願紫府增齡，蒼穹降祉，粲珠星
而璧月通靈，筴於琅函，式安知足之心。守
在不貪之寶，載祈善貸，俯徇愚衷。

辛未本命歲生朝醮詞

兩儀廣大，每跼踏如靡容。二曜光明，敢潛
藏于必照。爰輸丹悃，式叩蒼穹。伏念臣粗
識古今，唯知忠孝。幼從庠序，固嘗妄意于

功名壯掛衣冠因或冒居于寵利士也各行其所志時乎自棄以難逢奉身盍掃迹于丘園撫事猶累人以口腹進退非據廉恥何顏茲誠獲罪于聖賢久已甘心于貧病未能畢娶聊復營私賦麤頭鼠目之形是宜跋扈見簞食豆羹之色徒取譏嘲適當元命之年矧值劬勞之日特延羽客恭啓露壇嚴禳禱于陰愆儻導迎于純嘏伏願上真檢校高監昭回定一世之窮通契五行之消長安夫環堵北山之文弗移俾爾厖眉少微之星長粲享有生之常產樂無用之散材未盡頽齡悉繫鴻造

家公生朝設醮青詞

臣聞禍福由乎一已忠孝難以兩全儻微知止之明必抱終身之恨伏念臣父子俱塵于仕籍閩吳並脫于賊兵初赴難以請行驚魂未定迨再生而聚首舊觀復還有識者為之寒心謂茲焉可以柎駕而况道

不容以行其志奚必祿然後乃養其親彼
幸免者安可恃為有常抑過憂者始能全
夫無咎連年罪戾徒致煩言舉目怨憎孰
非見嫉與其蹈危機而涉世曷若躬苦節
以力田事君之日固長數口之家易足雞
豚布帛盡溫飽于人情鍾鼎山林適窮通
于天性臣願畢矣天聽臨之爰因臣父誕
育之辰敢舉家庭祈禳之禮伏望高穹垂
祐厯會除愆卜福地以閑居曲存覆載闔
私門而奠枕永荷生成

代人醮詞

藁笈琅函演祕文而有請雲車風馬鑿危
惻以來歆天聽雖高人心自感竊念臣妾
桑榆晚景螻蟻微蹤脫身兵火之餘避地
海山之上沉綿抵咎調護乖方屢反覆于
炎涼輒變移于寒暑鬱蒸內熱發彼譖言
抱冰霜而戰兢搜膏髓以昏憤巫醫並走
藥石交攻殊困養疴尚留殘孽必遇災躔

於陰譴爰占厄運以虔所肅款羽流仰降
臨于斗北恭陳穀旦樂長至于日南披瀝
肺肝收召魂魄伏願祥開碧落罪削丹書
三辰照以靈官五行順于司命滌除瘴癘
凜雪形神俾強健于寢興獲安平于飲咏
盡繫造化難報生成

疏

皇太后功德疏

真遊渺邈悵仙馭以難回梵供修嚴薦慈
闈而虔啓雲天悲慘兩涕霽霓恭惟大
行皇太后德比塗華仁深任姒蚤歷艱難
之步旋安保佑之榮福緣允屬于聖君位
果推隆于佛母奄終大養茂對中興皇
帝願力無邊孝思罔極勿問慈寧之寢忍
瞻長樂之宮永念劬勞何堪荼毒大行
皇太后伏願超昇堯率悟證祇園式憑竺
典之文夙受靈山之記仰祈大覺印知

追薦葉尚書疏文

地水火風四大終歸于有壞生老病死一身孰免于無常論壽夭亦遲速之間貫古今奚貴賤之別必資徹悟始脫輪迴某官履踐清修性根純熟久絕功名之念殊忘勢位之崇謙恭何啻寒儒長厚可謂君子住普光明境界通大方廣經文卜居宛在于別峯示病不離于丈室結習既盡果位復還徒擗踊其子孫定依棲于佛祖聊憑冥福式表契家伏願夙熏知見之香行毗盧頂上游戲功德之水出華藏海中悲憫浮世之塵勞超昇諸天之快樂仰惟大覺印知

募衆緣買魚放生疏文

寶勝如來解脫本根于六入流水長者功德具足于十千不起信心孰從猛捨憫闍都之俗習造殺業于歲除競決陂塘悉施網罟逐錐刃之利竭澤莫遺資口腹之饒垂涎未已今則化財結社發願放生圍：

洋：俾各全其性命波：挈：當自悟于
因緣雖碑無顏魯即之泐書而事有蘓東
坡之陳迹大眾歡喜諸佛證明

永福大興抄題修造疏

邑稱永福論山川秀氣則世出顯人寺揭
大興據水陸要津而地為爽塏宜金碧之
輪奐反荆棘以荒蕪過者孰從歸依居焉
寔成頽弊必仗檀那之起廢庶資名實之
相符上雨旁風真是雪山穿膝一椽半瓦
譬如佛塔聚沙福既永保于千季興乃大
同于四衆肯禪勝事願列芳銜

修建薦拔富沙水災黃籙會疏

頑雲屯野常時暑雨之霖靈駭浪滔天一
旦山城之冒沒風輪忽轉坤軸潛傾豈觸
怒于蛟龍遂喪身于魚鼈骨肉號呼而莫
救室廬漂蕩以無餘不問賢愚棄衣冠而
徒跣奚論貧富委金帛于泥沙咄怪事所
未聞哀群生其罔措孰曉神靈蒼茫之意

皆由造化倚伏之機重念甌閩荐罹兵火
尚瘡痍之未合何災害之荐臻頃戰鬪者
丁壯被傷今奔波者老稚通患方駢肩而
躑躅競滅頂以湮沉浮木蔽川既隱市聲
于陷地浮屍入海盡藏腐骼于叢鄉是用
憫彼驚魂遭茲非命欲拔九泉之冤滯必
祈三界以皈依願同居覆載之中忍坐視
幽冥之下不貪之寶可守厚亾之戒甚明
爰共濟于超升庶普霑于利益答羽蓋步
虛之朐蠶修琅函鍊度之威儀虔啓真科
實繫衆力

代人生朝道家功德疏

陰功休德來鍾積慶之門雅望重名式表
挺生之瑞仰上界神仙既降為人間宰相
奚疑童面之經默傳瓊田之草已植某官
伏願滄霧飮金石之氣飲光吞日月之華
火棗交梨夢想朝真于絳闕冰桃碧藕心
遊侍宴於瑤池船背長年方瞳難老永壯

明堂之柱右蔚為清廟之珪璋呵叱六丁
木鐸主盟于吾道平章五叟霖雨潤澤于
斯民仰賴高穹俯垂昭鑒

追薦趙無量疏

清社世家今流寓者止數族儒林舊德知
典故者餘幾人好事訪古印法書平生耽
野史名畫雖星散盡于兵火而風味存於
笑談政爾過從俄聞奄忽驚崇朝之永訣
撫陳迹以深悲某官城府坦夷門庭和易

寬街轡于臧獲重樽俎于交親時陪長者
之遊自任忘年之友謂宜難老何遽貪程
命信是呼吸間臂真成屈伸頃念犬馬之
齒偶長蒙閑居以輦行相推頽蒲柳之姿
易衰聊避俗而身名俱晦竊比鷓原之義
式修貝葉之科著鞭恐祖生先本無心于
馳騫作佛在靈運後庶育助于因緣

鎮國夫人功德疏

蜀道山雄必增崇于壽相坤維氣秀良鍾

聚於慈顏幸逢設帳之辰爰即布金之地
式憑緇侶共表精誠伏願某人宿植善根
勤修梵行自性如同佛性色身即是法身
道與時升挾象服以貂蟬之珥母由子貴
戲綵衣以袞繡之章鴻鈞將入輔于至尊
紫詔遂加封於兩國享千秋之燕樂備五
福以安榮慶及雲來息沾族系

聖跡院出隊求化疏

舊歲旱暵甚廣諸方乃大例闕堂今春飢
饉異常此地亦隨時貴糴維康僧之香火
號聖跡之道場初無田疇悉仰檀越鍾奩
之響已間斷粥飯之緣將落空是念貧女
一錢辦心即同辦供稍寬齋賜三篋知恩
方解報恩欲種善因勢湏猛捨莫看居士
面且試老婆心

為演老作衆緣水陸疏文

幽明異趣遵覺路以圓通生死同波賴慈
航而濟度諸佛子等沉迷五欲流浪三塗

造一切之苦因盡無明之業識爰經浩劫
莫值善因不有皈依孰為懺悔著儀文于
天監標顯現于咸亨緣雖起於阿難狀實
存于焦面願功德不可思議宜普勸信受
奉行若聖若凡竭誠心而發誓欣結社以
隨緣所冀罪垢消除悉願冤親解脫茲者
法筵清淨佛事精嚴肇新上國之壇場一
洗南方之耳目初中後而分夜去來今以
同時揆哀大慈大悲成就無遮無礙礙三

災八難丕變和平六道四生均霑利益

代梵天功德疏

五百歲而賢者生親送雅聞於釋氏三千
年而蟠桃熟竊嘗允屬於德星運值中興
才推間世伏願某官雄姿英發爽氣殊倫
善開方便之法門夙有慈悲之願力為蒼
生起名已覆于金甌現宰官身功佇調于
玉燭龍天期之外護龜鶴羨此長年敢憑
貝葉之文用益喬松之壽

追薦張永州功德疏

死生乃始終之說壽夭亦遲速之間要當
知闕陷世中切記取末後句子一百二十
歲未免這箇臘月三十日只做尋常坐斷
六道四生路頭跳出十方三界劫外某官
性通佛地學貫儒流詣闕上書欲展青雲
之步從軍草檄嘗為綠水之賓將懷印綬
以臨湘忽嘆神魂而遊岱真人無位出入
函門扇子上天築着鼻孔捨瞿曇何所依

伏這闕老不許商量行路同悲舊交增痛
爰修功德用薦幽冥伏願一念圓明千燈
照耀識破從前之眷屬盡是冤親悟了過
去之因緣莫非夢幻無復身世之孤苦兼
忘妻子之愛憎入解脫法門得自在三昧
往生極樂國常住菩提場

追薦李丞相設齋疏

死生旦暮之常輪迴夢幻談笑屈伸之頃
脫離聲塵自非宿植善根孰能頓超果位

某官本堅固為忠蓋廓智慧以聰明現宰
官身具足無邊之願力觀法界性了知一
切之妄心報地甚深貪程大速未盡六十
小劫不見甲子上元想廊廟之衣冠話言
如在陪山林之杖屨步武已陳委富貴于
浮雲忘功名于故紙愛憎俱泯毀譽全收
荔子丹兮爰值始生之閏梁木壞矣奚勝
永訣之悲是用恭叩佛乘普聞義諦真師
子吼奮迅廣長舌相流通難酬國士之恩
聊効門人之禮情文哽塞涕泗橫流伏願
悟一念於最初斷諸緣於末後徃西方極
樂世界度南閻浮提衆生

仙宗癸丑年修橋疏

雲外千山通諸方之道路秋來一雨起平
地之風波裏相現前成功忽毀等劫火之
俱壞輸巧匠以竒觀直須截斷衆流不勞
舡筏儻欲超登彼岸必假津梁凡所徃來
俱霑利益

薦拔水陸功德疏

蘆川老隱紹興六年四月二十六日
已時伏覩永福縣崇光寺前溪流暴
漲渡舡傾覆士庶僧尼若男若女等
約三十餘人並皆溺死即時呼舟拯
濟共活五人蓋緣吝財輕身喪身
失命民雖愚暗事可憫傷謹捨淨財
入崇光寺就二十七夜修設水陸冥
陽齋一會回食供僧用伸薦拔者

積潦漲溪覺自千峯之雨衆生爭渡意輕
一葉之舟傾覆在前踟呼莫救目駭驚濤
之壯神傷滅頂之凶良由共業宿因忽爾
橫罹竒禍弗謹危亡之戒可無性命之憂
葬魚腹以去多垂蛟涎而或脫諸佛子等
沉迷苦海不遇慈航流浪愛河未登彼岸
所願從今向去永斷貪嗔癡更同見在未
來常聞戒定慧凡為利益莫起風波

通老請疏

開山立碣必表洪照道場結社栽蓮嘗修
惠遠故事茲為勝地盍畀高人某人言澹
而行孤性踈而色野雅宜林下迥在世間
得句律于東湖訪師資于南嶺草堂初到
推法器以爭先黃檗遍參舉叢林而稱首
究竟雲居上足承當佛眼嫡孫千古風流
一時光彩元戎乃作家檀越居士則隨喜
門徒杖屨相從箭鋒莫避秋來雨過也防
蘭院鳴鐘月出猿啼正好帟溪送客

聰老請疏

宗風未墜大山門佛事鼎新法席久虛老
尊宿道場遴選式孚衲子允屬作家某人
不打葛藤善批判古人公案絕無滲漏皆
流出自己胷襟嗣續巴陵淵源臨濟雖然
把定正脉何嘗貶剝諸方厭負郭之石泉
三义路口遷侵霄之鳳軸百尺竿頭戴元
戎外護之恩逢聖主中興之旦一心奉請
四衆歸依願聞海潮之音速登獅子之座

攝龍象于叢社贊箕翼于蘿圖

明老請疏

擒縱殺活直須覩面當機成住壞空正好
安身立命古德有見成公案闍梨自錯認
話頭早知飯熟多時畢竟鐵牛在陝府又
被風吹別調洎令鷄子過新羅其人臨濟
正宗北亭嫡子頃化行于南嶽旋應現于
西峯出世最先罷參蓋久未肯得休去歌
太承當取胡來漢來切忌商量何堪疑着

舉叢林多證龜訪鼈是檀越皆把纜放船
歷知萬物本來無早是九年車不出百尺
竿頭進步孰不失驚天火聚裏翻身須還
好手到這裏且要將錯就錯為人處未免
隨鄉入鄉啐啄同時因緣會遇辦心不如
辦供知恩方解報恩普興三界之香恭祝
萬年之壽

請泐海通老疏

闍都分鎮三山鼎峙于城中泐寶創基四

衆川流於座下必得本分尊宿始成行道
叢林維東諸侯實大檀越欲全提其正令
遂決用以迅機某人龍門兒孫楊歧宗派
氣吞雲夢曾次露巖壑之姿語帶煙霞筆
端奮風雷之舌開曇華于丈室見德雲於
別峯所向歷然還渠識者人境俱勝戶外
之履甚多魚鼓一新屋上之烏轉好况問
泐無絕江之阻而入社有展鉢之頻何惜
明窻聊同隱 几閑浮生之半日發深省

于晨鐘佇迎象馭之臨恭祝龍顏之壽

遜老住報恩疏

大善知識無非方便為人一切衆生皆能
立地成佛未論三種滲漏莫非五位君臣
出家若是正因逢場不妨作戲毛吞巨海
鋸解秤鎚某人梵行精修宗乘圓覺蚤遊
靈石聞猿啼青嶂之深晚嗣雪峯看毬輓
白雲之際縱橫自在舒卷隨宜與諸方兄
弟結粥飯綠要後代兒孫同安樂界頃年

資聖之塵刹已起平地上骨堆今日鎮國
之機鋒誰解虛空裏釘鉸明眼鴉王之擇
乳實相香象之渡河將什麼喚作報恩祇
這箇名為嗣泐祝聖壽以第一義諦談禪
于不二泐門大家且唱太平歌何處更覓
西來意

代請歌公長老住福清蘆院疏
大千世界阿蘭若全盛于東南百丈規繩
比丘尼各分其保社必推泐器以振宗風
爰堅男女之信心用續佛祖之壽命其人
飽參尊宿行業精勤徧在道場禪機警悟
節粒食而惟啗香蜜屏綿纈而常衣芻麻
事類古賢名聞知識蒙諸方之印可審四
衆以歸依女子定開不妨拈出老婆心切
大是作家未容北斗裏藏身且要僧堂前
相見興久年之蘆院舊店重開看今代之
末山逢場作戲好唱還鄉曲休歌結草菴
願贊覺慈共祈眷筭

代請真戒師住圓明疏

粥奠齋鼓到處皆是道場露柱燈籠現前
無非佛事莫問山林城市當隨時節因緣
某人得自在禪修平等觀遍諸方而遊戲
盡四衆以歸依承嗣作家宗師批判古人
公案久矣薰天炙地宛然運水般柴去住
無心未用身藏北斗卷舒在我且將芥納
須彌要令海印家風不離普門境界雖則
因風吹火何妨洗脚上舡請效嵩呼來陞

猊座

泉州惠安大中院請前任永春

太平智銓住持疏

縱橫妙用無非信手拈來啐啄同時未免
逢場作戲墻壁瓦礫猶能說露柱燈籠總
會禪直下承當不容擬議某人雲門後裔
通照宗風雖無瞞人之心宛有超師之作
因緣偶合行解圓融直饒一道神光已是
兩重公案接得住山斧正在相風使帆執

取夜明符便要斬釘截鐵恁麼則冰消瓦
解任從它水長舡高驢事未了馬事來張
公喫酒李公醉最好箇轉身路莫錯認定
盤星請續不盡之燈願祝無疆之壽普聞
法語共戴人王

請前金地長老了性住永春太
平院疏

大丈夫始解出家古尊宿各明已事橫擔
榔栗到處同參眨上眉毛詎令蹉過覓心
了不可得問佛方知有因某人具無所礙
辨才咆哮獅子窟識未生時面目吐盡野
狐涎曾施陷席之機宛在布金之地據此
見成公案還他靈利衲僧更須本分鉗鎚
乃顯作家手段巴陵平生三轉語足以報
恩徑山會不五百人要知問取振起太平
場席承當臨濟兒孫決定論芥子須彌擬
議間龜毛兎角一口吸盡西江水馬駒踏
殺天下人演乾竺貝葉之文祝震旦玉旒

之壽勿藏斗裏後聽蒿呼

請竹菴普說疏

中原虜禍棄別業而久荒南土寇攘挈行
裝而蕩盡故鄉返如流寓一室本自空虛
服五載之苴麻營四喪之丘壠舉家食粥
者屢矣指困贈粟者蔑然絕憐有患之身
幾至無衣之歎持是心以堅忍偶未死于
悲摧終祥祭而鬻弊廬事禪販而贖逋券
少年尚氣赴人之急何難老境偷閑治生

之謀乃拙念阿堵特積散忒來之物使衆
生分愛憎喜怒之情不有舉揚誰共諦聽
今日居士長者共作證明爾時債主冤家
悉皆解釋願聞安樂法常結清淨緣

請惠安大中長老義端住南安

延福寺疏

呵佛罵祖未當儂儻拽把牽犁幾乎敗闕
具得正法眼識取最上乘機旋風打不妨
八面來臺山路大好驀直去某人掃除物

我脫離聲塵嗣真歇之家風出清源之宗
派道價夙經千印可叢林蚤許以歸依參
透古德話頭捩轉袖僧鼻孔咸推老手數
主名藍與麻赤灑：時箇中活發：地念
巖頭之故居虛席捨筆諫之真蹟來歸未
須禪牀上接人且要泐堂前刻草深錐痛
劄把定放行任它諸方號十字街頭須還
丈室住三家村裏靈羊掛角大象無疑香
象渡河請師速道福延此土筭祝至尊願
開不二泐門共聽第一義諦

代人作湯牒

白雲飛出特地風光黃梅熟時端的消息
頂門眼負荷大泐室中句親切為人賓主
已分因緣非細某人平生脊梁孤硬遍參
拄杖橫行普熏知見之香深入禪悅之味
咬破鐵酸餡吞却栗棘蓬冷暖如飲而自
知中邊俱甜而無礙三脚驢猶看鞦韆草一
隻箭已射入城衆所甘心言須苦口請嘗

霜後菴摩勒始信美勝天酥醃祇恐坐斷
舌頭不怕築着鼻孔

茶榜

騎着佛殿何妨老漢放風狂掀了禪床只
恐諸人沒手段未咬破雲門餅且喫取趙
州茶悟最上乘履真實際種田博飯初心
學古德任山擊鼓升堂隨分為檀那說法
直得龍天歡喜是且緇素歸依百尺竿頭
翻身有句三家村裏舊店還開團：秋月
照碧潭鬱：黃花明翠竹莫問君臣賓主
但觀時節因緣煎春露之一杯生清風于
兩腋敢勞大衆同應當筵

湯榜

般柴運水居山妙用縱橫掃地焚香舉世
生涯冷澹苦向箇中薦取何勞直下承當
依象王行作獅子吼折脚鐺煨糞火絕念
紛華柳栗捧掛鉢囊信緣去住十二時無
非佛事大千界獨現法身可謂是石火電

光不容貶眼到這裏泥牛木馬各自點頭
且置葛藤同參藥石味長松以舌本澆甘
露於心田恁麼宗風真堪贊嘆略展家常
禮數重煩清衆證明

茶牘

一口吞盡遮莫向作掌勢處承當信手拈
來要須未舉托子時會取標禪律雖古今
立異問佛汰則南北何殊迺眷閩中罕聞
座主欲識人天眼目且隨粥飯因緣續無

盡燈八萬四千門悉皆歡喜轉大藏教三
乘十二分本自流通某人願力慈悲身心
廣博常誦七俱胝神呪度脫衆生獨傳五
印王梵音參同密印出入華嚴境界游戲
賢首道場大目溪邊誰論去來之相小華
峯下聿新圍繞之儀甃牛之塵已橫貝葉
之文未墜况是禽呼春起不妨花泛芳香
聊煩瑞草之魁普為雲堂之衆俯臨法會
共洗塵昏

代人湯禱

黃牛熟炙橘皮叢林榜樣嵩老濃煎姜杏
古德家風欲發初地鈍根未免重下注脚
居士長者塵、刹、生信心國王大臣在
在處、為外護某人辯才無礙妙湛總持
橫說倒處流通胡現漢現具足沒量神通
真散聖平生受用輸作家護戒律之精修
善神捧足感標科之奧義諸天雨花講席
肇新法門永賴出廣長舌相遍滿三千大
千化清淨法身歸依一佛二佛甘苦箇中
薦取冷暖隨人自知龍華會上好結緣吉
祥老子不孤負敢勤清衆為作證明

茶榜

香巖圓得瀉山夢兩手擎來院主透過趙
州關三喚拈出好太百草頭薦取更向一
椀下承當某人道眼分明家風淡薄密付
雲居之古衲飽嘗安樂之靈芽花乳清冷
風生兩腋塵根迥脫舌覆大千本眠雲卧

石之人應重手入鄣之供白足之師高潔
聊復火種刀耕青蓮之字莊嚴何妨草衣
木食活泉新汲小鼎微鳴莫問春去春來
有箇省處但見漚生漚滅驗在目前辱海
衆以臨筵講山門之常禮

精嚴寺化鍾疏

晉安郡西南隅群山挿天林麓鬱蒼彌望
秀色絕江而往地號水西中多蘭若金碧
輪奐有古道場是名精嚴今榜曰顯忠資

福院歲在戊辰僧結制日洛濱最樂普現
三居士拉蘆川老隱過其所而宿焉徐聆
鍾聲殊令噌吰同作是念維大山門晨夕
所考擊一切聞聽豈應如是譬猶健丈夫
堂：七尺且乎音吐發越洪暢而乃喑啞
弗稱其軀是山門病爾時長老恣勲即從
座起而白衆言時節因緣自當改作居士
長者等是曰檀施熾大火聚鼓大鑪輔不
日成之亘千萬年與茲山永久政在今夕


心念間必使衆生無明一撞盡警祖師正
令三界普聞其功德不可思議諸公相視
皆大歡喜歸而為之疏以遣化云

勸施金剛經疏

開元老一公禪師歲在戊申住福城西顯
報嘗發心願募賢士大夫三十二位自書
金剛般若波羅密經各一分鏤板印施經
成之日具伊蒲塞饌人受一部盡此報身
持誦不輟凡書經者止著郡望仍各捨錢

參旣為工墨佛事種々所費此志已二十
禩矣猶未能圓成維是經有不可思議無
量無邊大功德古今因果報應贊嘆難盡
時節因緣正在今日願入社者幸題姓名
如或書寫未暇只欲隨喜受經亦希垂示
共結勝緣

蘆川歸來集卷第十四



原件短缺 **卷15**

蘆川歸來集卷第十六

大監蘆川老隱幽嵒尊祖事實

福州福清縣幽嵒院行者啓通
等右啓通等今在常州武進縣
張祕丞處將錢貳拾貫文銅錢
玖拾柒陌欲買田地逐年收地
利捨入幽嵒院作女弟子張九
娘䟽奉為
外翁秀才劉四郎 外婆張三

十四娘 亡妣劉二十九娘三
人忌晨供僧表白今先交領得
銅錢壹拾貫文玖拾柒陌其餘
錢別支別前去兼托 劉立之
秀才勾當今立交領文字為憑
謹狀熙寧捌年拾貳月 日
福州福清縣幽嵒院行者啟通押
狀 同領錢肯習押

祖少師文靖公手澤判押

九娘收此照會更將此批與
十伯處可取拾貫文九十七陌
添與此人且先附信去要添置
田地收利入幽嵒廿三日 押

祭祖母彭城郡夫人劉氏墓文

昔我先祖未取科第粵時夫人始作之配
儒生窮愁想見中饋逮生多男室則已繼
同穴送終是為林氏宜夫人宅獨厝茲地
荒山叢林樵牧不至歷數十載父老不記

有孫爰婦發其久翳聞諸里閭歎息出涕
生雖不享死亦子貴彭城之封象服煒
醜酒割牲用示幽賁嗚呼哀哉

先祖特進始娶劉氏劉無男子獨
產二女長則夫人次適于鄭又皆
無男子也先祖既嘗力賁葬其外
舅姑夫人之亾遂祔其次自爾應
舉覓官寢以仕宦子孫不復來尚
以田屬幽崑俾供諱日今數十年

矣元幹獲緣職事道過墓下翦伐
荆棘掃除阡隧并得翁媪之墳祭
拜焉庶幾克成先祖之志乃刻鄙
文以告後來宣和元年八月初吉
孫元幹記

蘆川豫章觀音觀書

元幹以宣和元年三月出京師六月至鄉
里十一月乃復治行得 先祖特進手澤
於外孫陳氏蓋 先祖幼養於姑家長則

為其婿劉氏無男子而祖母止出一女適
陳氏亦不壽今家姑暨諸父皆林夫人子
也觀夫買田作供以為久遠計不委之子
孫而授之陳氏所以貽子孫懃者可見矣
曾未百年寢已蕪沒幸而得之自謂可以
贖責也 先祖塋兆在仙宗觀東有林氏
子葬其親遽遣匠石於神道華表之前青
龍左臂之上取可以為柱為礎者枚數至
二百有奇輦于山南新阡旁者殆過半元
幹謂鄉曲當責以義此石既鑿訟之何補
第築其毀作亭數椽以為歲時愒息之地
棄已輦之石移書愧之 先祖有舊屋在
村落中子孫不復居今為傭耕者所舍元
幹奉 二代畫像於正寢擇淨人嚴香火
灑掃之役使過者猶曰文靖宅也 先祖
凡五男子其仕官者四獨六伯父終于布
衣老妻二子雖仰食於諸父然頗為債家
所窘元幹載念伯父之歿以時之不易藁

葬蔬圃迨今三十年二兄不振無乃以是
特卜爽塏遷之異其孤之或興不獨平其
券也有鄉先生鄭俠介夫者年垂八十及
與先祖遊元幹見時所願見贄書及門
適已抱病延入臥內歡若平生而遺言餘
旨預聞一二後數日遂哭之若有待然先
是姨母寓信陽老矣元幹所未識枉道拜
之悲余母早世而喜元幹長大也為留數
日蓋母孫亾時元幹方卅角既至里中宰
木雖拱門墻缺然周覽流涕凡所以為觀
美者心固欲之而力有未及也不能已
於是繚山以垣加植松柏揭氏號于門庶
幾它墳焉元幹平生坎壈屢違手足之釁
去家時僅存一弟甫三歲又夭折異日亦
有未葬者歸其骨並瘞之是行也既得劉
氏三塚治完之且獲是書以傳于家則窮
年奔走亦復何憾因錄可訓子孫者二年
正月十四日豫章郡觀音觀書

宣和間名賢題跋

掃除先遠之丘墓掇拾祖德之手澤真子孫職也而又能以文字翰墨發明之仲宗之于是舉也于是為得矣退之稱歐陽詹慈孝最隆其為文章善自稱道吾于仲宗亦云宣和二年二月廿七日豫章洪芻駒父書

張侯仲宗近作殊有老成之風無復少年書生氣適閱越數千里及見大父時客非獨手澤存焉掃劉夫人冢不忘其本也東湖居士書

為士而能尊其祖為子而能幹父之盡此可久之習也碎采燦然足以有譽于世矣宣和庠子陳瓘書于廬山之南知士無難得其用心斯知之矣今仲宗得大父手澤數言于亂紙中遂嚴飾而藏之以詔子孫此其用心必且淬礪其質追琢其章以發揚幽光詎肯失其本心以貽前

人蓋乎君子是以賢之宣和庠子建安游
酢書

文章可以感人非有本者不能也仲宗去
親庭適數千里外見于行事皆忠厚悃幅
與世之游子異矣故其自叙使人讀之慨
然增丘壑之念宣和壬寅劉路書

余崇寧間與安道少卿同仕于鄴公餘把
酒以詩相屬時仲宗年未及冠往來屏間
亦與坐客賡唱初若不經意而辭藻可觀

莫不駭其敏悟安道既入朝其後數年
余亦歸自河朔再會于京師仲宗事業日
進又數年復見之則已卓然為成材矣蓋
其天資夙成素有以過人也至于竭力松
楸克勤祀享篤于禮義孝愛之道所謂文
質彬彬者歟此又可嘉也於是乎書廬陵

歐陽懋

仲宗昔予太學同舍即嘗哀其亡友唐懋
生詩帖軸而藏之標飾燦然如諛達人貴

公得氣時予嘗書之嘉其朋友之義今又書此以見其為人子孫之孝宣和五年五月晦仙井何棨文縝題榘文度同觀

昔馬少游願為郡掾吏意在墳墓笑伏波有大志人志固不同也至伏波在壺頭乃始念其語少游幾近本哉仲宗諸父皆顯用于時武部以久次求本郡將行復留士大夫一出而難返如此賴仲宗及為小官時周旋荒遠補所闕遺了堂先生推言幹

蠱之義善矣舉斯而言吾家季父得奉使鄉部十年歲時輒至山林豈非私室之幸邪宣和甲辰中秋五峯翁挺謹題

世之人處父子兄弟間有厚有薄其有厚者非真能孝友也施報不一意慮為變出于有激云爾然則如之何而可曰惟無所薄者為能有厚也觀仲宗之所立則古人之意得矣宣和五年六月二日呂本中書仲宗隆于慈孝蓋天性然也苟其本立矣

則積而為事業發而為詞章豈復有二道哉有德者必有言其仲宗之謂乎宣和六年四月九日趙郡蘓庠書

仲宗諸父皆特進公繼室林夫人之子俱非劉氏出也其子孫聲容蓋未嘗相接觀公付委陳氏之意所以望其子孫其責亦輕矣仲宗得其手澤乃訪尋于丘荒藁莽之間割牲醜酒以致其誠意又為文刻石以表識之其於尊祖追遠之義盡矣吾將見其流風所被使鄉邦民德歸厚必自茲始也宣和甲辰四月辛亥龜山楊時書

仲宗尊祖追遠之志叙事記久之文余不復贊其贈言皆百世之士後之觀仲宗者可以知其為人矣宣和甲辰四月六日鄱陽汪藻書

予曩與安道少卿遊聞仲宗有聲庠序間籍甚恨未之識今年春仲宗還自閩中訪

予梁碓之濱聽其言鯁亮而可喜誦其文
清新而不羣予洒然異之然未敢以是知
仲宗者士之難知久矣富于文而實未必
稱敏于言而行未必副曷敢輕許人哉別
未幾仲宗復貽書勸：以其大父手澤
諸公所跋示予且求一言夫學士大夫則
知尊祖矣君子薦于親則民興于仁推是
心以往所以稱其文而副其言者率如是
古人不難到也在仲宗勉之而已宣和甲

辰孟夏晦李綱伯紀書

後四年歲在戊申仲冬旣望李維仲輔李
經叔易同觀于梁谿拙軒時季言如義興
未還

買田飯僧眷：于冢間之餒魄 特進公
加人一等矣仲宗之文忠厚惻怛叙事條
鬯蓋其孝友淵源所從來遠也宣和甲辰
九月旦日王以寧書

宣和六年十月廿八日劉安世嘗觀

銓與仲宗遊且十五六年得其治性修身求師尚友之道有軼于羣公所稱者若夫懷念祖德俾發聞于人特其盛德之一爾宣和七年二月丙午汝陰王銓書

仲宗以行義之美成于事親溢于先祖訪之故老得其祖布衣時前夫人劉氏之墓表而出之以示後昆嚮非仲宗之孝愛格于幽明儻故老之不存文字之泯沒無所考據則劉夫人之冢長翳草棘間

矣豈不悲哉古今文人撰著甚衆使人讀之或至太息流涕者以忠孝之實存焉爾仲宗于其祖夫人之文也豈不然哉眉山蘓迨書

余頃未交仲宗先伯氏景方趨使交焉然此時但見仲宗詩文蔚然可愛固已恨得交之晚乃今復以懿行見信于當世賢士大夫則余曩日之所以愛仲宗者殆誤矣孰謂先伯氏平生取友止于文詞間

盧川先生集卷六
二
哉因是又使人追念賢兄而流涕也譙郡
張祿書

仲宗平昔負絕俗之文今又見高世之行
羣公贈言足以不朽矣願予何足以進之
強為題跋云宣和乙巳中秋後二日山陰
李光

近世士大夫有捨其父祖而惟外氏之尊
憑藉其名聲權勢而致位貴顯者視 張
子此事真可嘉矣靖康改元七月十四日

眉山任申先

仲宗之用心與見于行事者每有過人非
獨此事也所與遊皆一時名人勝士可謂
行不負于幽顯矣而云：者猶不止嗚呼
斯其所以為賢歟建炎二年十一月十七
日江端友

永福張仲宗國士也忠厚足以勸薄俗義
風可以勵浮淺至于純孝錫類追遠奉先
出于天性生資又何疑焉逝者果有知乎

蓋不可考然車過三步腹痛勿恠豈獨為一時戲笑之言邪睢陽王浚明書

陳晉之夢得其六世外祖鄭氏故瑩于荒榛野蔓間歲旣踰百烝嘗弗墜 殿撰張公深道作詩以紀異有云莫言伯道無兒嗣看取千秋祀事存兩公皆閩之君子也今 殿撰公之猶子元幹仲宗所立復如此諸老先生又從而嘉歎之誠可以風薄俗云李易謹題紹興二年人日

說者每嘆近世無忠臣非無也求之于孝子之門則必有足觀者 仲宗幹盡之譽書于廬山之南而梁谿之濱且勉之使推是心以往異時移以事上將見憂君之憂無適而非忠也紹興壬子正月二十八日里人辛炳

掃祖母之松楸寶大父之手澤省母黨謁鄉先生通有無于伯仲而葬其亾者此士人所當為况仲宗之賢乎蓋仲宗官遊四

方時適歸焉不以能為之為難而以得為之為幸此記事之文所以作也若以仲宗為非劉氏所出之孫乃能切：如此便加贊美一何待仲宗之薄邪一種天地豈有先後之間乎仲宗上塚時諸父各列于朝不能即歸仲宗乃幹父之蠱爾了翁之言可謂句中具眼夫了翁百世師也下視時輩如黃茅白葦耳幹蠱之語豈輕以予人仲宗于是為賢紹興二年人日拚欄鄧肅

志宏

士而尊祖所當為也今之學者類喜近名而不知為所當為于吾仲宗不得無愧劉殷少孝于祖母神賜之粟七年仲宗行老矣而方諱窮造物其終報之耶筠溪李彌遜書

仲宗孝愛忠厚之意見于筆墨之間蓋不獨文字妙當世也表章仲宗尊祖之義者其人往：余所欣慕亦足以見仲宗所

與遊多天下長者也新安朱松紹興壬戌
十月七日觀于連江玉泉寺上方
觀 仲宗此文感念洛陽松楸未知拜掃
之日不覺涕泗橫集乃知此文之傳足以
勸夫為人之孫者三復歎仰紹興癸亥二月
廿二日洛陽富直柔題

紹興癸亥仲春晦仲宗出此軸相示并得
熟讀諸公跋語所以贊美 仲宗尊 祖
薦親之意既詳且盡不可以有加矣復何
言哉歎仰之餘因書其後延平葉份
仲宗用心如此而所推許者皆一時名人
可以厚風俗矣紹興癸亥六月旦觀于福
唐東野亭石林葉夢得書

欽臣 幼侍 先君提舉官遊每見好
古書畫心竊喜之時或展玩欽臣必
走膝下癡問 先君以其不好弄

亦深受愛之一日發篋得數紙墨刻
立息若不憚謂欽臣曰以吾家判監
幽崑尊祖事 盧川刻本于闕
余欲歸未能也欽臣雖獲記其言
未悟其立息 父歿數年弟兄
三人偕仕欽臣石知何從得此舊藏
念欲哀而為一食負未暇今南安

倅清臣家兄旦襄丞吳江得黃文
昌書三高詞刻石垂虹欽臣假令
武攸得 胡忠簡子 提刑公示
及賀新郎二詞真蹟諸賢見
之叙述稱嘉謹已摸本成帙欽臣
承乏楚日川併以家集錄梓信臣弟
待次京局實司之因誦甲戌自贊


而知 盧川初度之年存辛未誦
上陳侍郎詩序而知掛冠之年甫
四十一揮塵錄所載亦復叙收九
詞翰可無遺逸矣獨 幽岩孝
慕一節人未知之者 鑿固欲成
先君之志以所藏閩中石刻并刊
歲月因循復恐志大心勞遽然難


就敬玩題跋皆 宣政間偉人蓋
以其尊祖譽蓋稱不特美其詞
翰也今 盧川歸弇閩之螺山
先君昆仲三人二居華亭一居知縣
歸閩其後未有顯者 都運寺
正叔父之後巽居師居二兄未脫選而
殂渙居兄自太學登科止於一尉

益臣弟今已升舍奏平請舉該
免且丁家棘欽臣兄弟將欲拜掃
松楸如 蘆川祀 祖母劉夫人
之墳收伯叔兄弟之葬築亭於耳
屋俱未効其髣髴謹以幽品顛
末及名賢跋語附于文集目曰幽品
尊尊祖錄此亦 蘆川所書以傳

子孫使知有尊尊祖之誼云吉茹定
己卯益冬孫通直郎知於潛縣欽臣
敬書于縣齋衣繡堂

蘆川歸來集卷第十六





蘆川歸來集十六卷

宋張元幹撰

清抄本

二冊

存六卷 六至七、十二至十四、十六

本部書完

書 號 7683

本片卷含